



Die 25 Octobris
B.M.V. REGINÆ PALESTINÆ
SEU TERRÆ SANCTÆ
Patrona Principalis Diœcesis Patriarchalis
Sollemnitas

Ant. ad introitum

Ps 44, 10

Astitit Regina a dextris tuis, in vestito deaurato, circumdata varietate.

vel

Gaudeamus omnes in Domino, diem festum celebrantes sub honore beatæ Mariæ Reginæ: de cuius sollemnitate gaudent Angeli et collaudant Filium Dei. Allelûia.

Collecta

Deus, qui admirabili providentia cuncta disponis, te supplices exoramus: ut sanctam Palestinæ terram, in qua Unigenitus tuus sacra Redemptionis mysteria ineffabili caritate perfecit; intercedente Beata Virgine Maria, Palestinæ Regina, ab omnibus adversitatibus defensam, in sancta professione maiestati tuæ dignanter servire concedas. Per Dominum.

LECTIO PRIMA

«Erant perseverantes in oratione cum Maria, Matre Iesu»

Lectio Actuum Apostolorum

cf. 1, 12-14 2, 1-

Postquam assumptus est Iesus in cælum, reversi sunt Apostoli in Ierusalem a monte qui vocatur Oliveti, qui est iuxta Ierusalem sabbati habens iter. Et cum introissent, in cenaculum ascenderunt ubi manebant, et Petrus et Ioannes et Iacobus et Andreas, Philippus et Thomas, Bartholomaeus et Matthæus, Iacobus Alphæi et Simon Zelotes et Iudas Iacobi. Hi omnes erant perseverantes unanimiter in oratione cum mulieribus et Maria Matre Iesu.

PSALMUS RESPONSORIUS Mac 6, 14-15. Sir 45,14. Cant 5,1 (R: Lc 1,48)

R. Beátam me dicent omnes generationes.

- 1 Præposuit eam Dominus super universum regnum suum, et dedit ei diadema, ut filium suum nutriret et regnaret. *R.*
- 2 Corona aurea super caput eius, expressa signo sanctitatis, gloria honoris et opus fortitudinis. *R.*
- 3 Veni Regina nostra, veni Domina, in hortum tuum. Odor vestimentorum tuorum super omnia aromata. *R.*

LECTIO SECUNDA

«Mulier amicta sole, et luna sub pedibus eius»

Lectio libri Apocalypsis beati Ioannis Apostoli 11, 19; 12, 1.3-6.10
In diebus illis:

Apertum est Templum Dei in cælo, et visa est Arca Testamenti eius in Templo eius.

Et signum magnum apparuit in caelo: Mulier amicta sole, et luna sub pedibus eius, et super caput eius corona stellarum duodecim.

Et visum est aliud signum in caelo, et ecce Draco rufus magnus, habens capita septem et cornua decem et super capita sua septem diademata, et cauda eius trahit tertiam partem stellarum caeli et misit eas in terram. Et Draco stetit ante Mulierem quae erat paritura, ut cum peperisset Filium eius devoraret.

Et peperit Filium, masculum, qui recturus est omnes gentes in virga ferrea; et raptus est Filius eius ad Deum et ad thronum eius. Et Mulier fugit in desertum, ubi habet locum paratum a Deo.

Et audivi vocem magnam in caelo dicentem:

«Nunc facta est salus et virtus et Regnum Dei nostri et potestas Christi eius».

Verbum Domini.

ALLELUIA

Iudith 13, 17-18

R. Alleluia V. Laudate Dominum Deum nostrum, qui non deseruit sperantes in se; et in me ancilla sua adimplevit misericordiam suam.

R. Alleluia.

EVANGELIUM

«Beata quae credidit, quoniam perficientur ea quae dicta sunt ei a Domino.»

† Lectio sancti Evangelii secundum Lucam 1. 41-50

In illo tempore:

Repleta est Spiritu Sancto Elisabeth, et exclamavit voce magna et dixit: «Benedicta tu inter mulieres, et benedictus fructus ventris tui. Et unde hoc mihi ut veniat mater Domi-

ni mei ad me? Ecce enim, ut facta est vox salutationis tuae in auribus meis, exsultavit in gaudio infans in utero meo. Et beata quae credidit, quoniam perficientur ea quae dicta sunt ei a Domino».

Et ait Maria: «Magnificat anima mea Dominum, et exsultavit spiritus meus in Deo Salvatori meo, quia respexit humilitatem ancillae suae. Ecce enim ex hoc beatam me dicent omnes generationes: quia fecit mihi magna qui potens est, et sanctum Nomen eius, et misericordia eius in progenies et progenies timentibus eum.»

Verbum Domini.

Super oblata

Placeant tibi, Domine, oblationes,
quas in beatae Mariae, Reginae nostrae, sollemnitate detulimus,
et sicut illi magna fecisti,
sic nosmetipsos tibi perfice munus aeternum.
Per Christum.

Praefatio de Beata Maria Virgine: Et te in festivitate.

Ant. ad communionem

Beata Mater, et intacta Virgo, gloriosa Regina mundi,
intercede pro nobis ad Dominum.

Post communionem

Cibus quem sumpsimus, Domine,
in sollemnitate beatae Virginis Mariae,
suum in nobis operetur effectum,
ut, qui terram sanguine Filii tui consecratam,
a te peregrinantes incolimus,
ad patriam tandem perveniamus aeternam.
Qui vivit.